

Z d  
3610



Q XII, 35<sup>m</sup>

(Kat 5,355)

1579











6

A. V.

Eine Leichpredigt  
In der begrebnis des  
Bestrengen vnd Edlen Davids.  
von Ponikaw / etc.

Gethan zu Leipzig / den 28. Julij / An-  
no 1579. Durch D. Nicolaum Selneccerum /  
Pfarerrn daselbst / wie dieselbige nachgez  
schrieben vnd auffgezeichnet  
worden ist.



Psalm 17.

Ich wil anschawen dein Antlitz in gerech-  
tigkeit. Ich wil satt werden / wenn ich erwa-  
che nach deinem Bilde.

Leipzig.

M. D. LXXIX.

Faint, illegible text at the top of the page, possibly bleed-through from the reverse side.

Second block of faint, illegible text in the upper middle section.

Third block of faint, illegible text in the middle section.

Fourth block of faint, illegible text in the lower middle section.

Fifth block of faint, illegible text in the lower section.

M. D. LXXIX





überschwengliche gnade / durch vieler dancksagung / Gott reichlich preise.

Darumb werden wir nicht müde / sondern ob vnser eusserlicher Mensch verweset / So wird doch der innerliche von tag zu tag vernewert. Denn vnser trübsal / die zeitlich vnd leichte ist / schafft eine ewige vnd vber alle maß wichtige Herrlichkeit / vns / die wir nicht sehen auff das sichtbare / Sondern auff das vnsichtbare. Denn was sichtbar ist / das ist zeitlich / Was aber vnsichtbar ist / das ist ewig.

**W** Liebten im HErrn Christo / Dies weil wir hie eine Christliche Leich haben / vnd zur Erden bestatten / den Bestrengen / Edlen vnd Ehrnuehsten / David von Posnikaw / der in erkenntnis vnd anruffung vnser HErrn Christi Ihesu / diesen samerthal gesegnet hat / vnd seliglichen eingeschlaffen. So haben wir dauon wegen / vns zu Erinnerung / die wir noch im leben / vnd jekt beysein sind / vnd zur Lehr vnd zum trost / diese wort S. Pauli für vns nemen wollen / darinnen S. Paulus vns erstlich anzeiget / worauff wir sehen sollen / wir sind gesund / wir sind krank / wir sind lebendig oder sterben / vnd was vnser Datum / wie man es pfleget zu nennen / sein sol / vnser Zweck vnd ziel / darauff wir achtung geben sollen / Nemlich / der HErr Christus / mit seinem leiden vnd sterben / Er der HErr / der da ist warer Gott / vnd wie ihn S. Paulus nennet in diesem Capitel / das Ebenbild Gottes des Vaters / auff des lehre wir sehen sollen / die er  
vns

5  
vns gegeben hat / die wir nennen die lehr des heiligen Euangeli-  
gelij / dauon hie geschrieben stehet / das es sey das Liecht / ein  
solch Liecht / das vns weiset das Angesicht vnd die klarheit  
Christi Jhesu / vnd scheint vns allen / die wir Christen sein /  
das sich keiner mehr kan entschuldigen / wenn er bleibt in der  
finsternis / vnd verdirbet darinnen / vnd wird verdampft /  
denn ( spricht der Apostel Paulus ) es sey sein eigen schuld /  
darumb / das er nicht wil achtung geben auff das Liecht / vnd  
auff das Angesicht des HErrn Jhesu Christi / der vns ers-  
schienen ist / vnd in vnserm herken auch ein Liecht wil ans-  
zünden / welches scheint in das ewige leben / vnd in die Him-  
lischen freude / vnd ist ein solches Liecht / das vns erleuchtet /  
vnd versichert / das wir sind Kinder Gottes / die da wollen  
vnd sollen ewig leben / vnd selig werden. Darumb spricht  
Paulus / sollen wir achtung drauff geben in allen vnserm  
thun / es gehe vns wol oder vbel / vñ sehen allzeit auff das An-  
gesicht vnd klarheit Jhesu Christi / vnd auff die offenbarung  
von der erkentnis der klarheit Gottes in dem Angesicht Je-  
su Christi. Denn in ihm sind alle Schätze der weißheit vnd  
krafft Gottes / vnd alles was wir bedürffen zur versöhnung  
mit Gott / vnd zur ewigen seligkeit. Denn solches ist alles  
gelegen an dieser Person / die da ist vñ heist der HErr Chris-  
tus / wer den ergreiffet vnd fasset durch rechten Glauben in  
sein herz / der sol gerecht vnd selig werden / vnd bestehen kön-  
nen für Gott vnd seinem Richterstuel / vnd sol sich nicht  
fürchten noch entsetzen / sondern wissen / er sey in Christo /  
vnd Christus sey allezeit in ihm / er sey gesund / er sey krank /  
er leb oder sterbe / vnd sey in dieser Welt / oder sey nicht in  
dieser Welt / Es sey Leib vnd Seel in ihm beysammen / oder  
sey nicht beysammen. Ob gleich die Seele abscheide vom  
Leibe / so ist sie in Abrahams Schoß / vnd bey dem HErrn  
Christo. Vnd ob gleich der Leib mus verwesen / vnd den

Wärmern zu theil werden / ligt nichts dran. Der HErr  
 Christus hat ein starcke stimme / ja er hat ein allmechtige  
 stimme / der wird ihn wol wider auffwecken / nicht zum ver-  
 damnis / nicht zur ewigen qual / sondern zum ewigen leben.  
 Das ist das erste / das vns S. Paulus hie von Christo wil  
 fürhalten / vnd von dem liecht des heiligen Euangelij.

Darumb wir auch Gott dem HErrn / ein jeder für sei-  
 ne Person / dancken sollen / das wir auch in dieser zal sind /  
 denen der HErr Christus geprediget wird / vnd denen das  
 Liecht des Euangelij scheint / Auff das wir wissen können /  
 wenn wir heut oder morgen von hinnen aus dieser Welt  
 oder Jammerthal fahren sollen / wohin wir kommen / vnd  
 wenn vnser Leib eingescharrret wird / wo er hinfalle / ob er  
 schlecht hinfalle / wie es vor vnsern augē ein schein hat / in die  
 kalte Erden / oder / ob er ( wie wir denn Gott lob wissen ) sein  
 sanfft einschlasse / vnd sich lege in die Schoß Christi Ihesu /  
 dem wir vnsern Leib geben auffzubehalten / als ein *depositum*  
 vnd ein Schatz / Tempel vnd wohnung des heiligen Gei-  
 stes / sintemal auch vnser Gliedmaß sein ein wohnung / *do-*  
*micium*, oder ein Pallast des heiligen Geistes / der in vns ist  
 vnd wohnet / vnd sein werck in vnsern gliedmassen verführet  
 vnd außrichtet zur Ehre Gottes. Darumb wir Gott von  
 herken dancken sollen / das wir dieses hören / lehren vnd ler-  
 nen / vnd in vnser herz fassen können / vnd darauff seliglich  
 abscheiden / wenn es Gottes gnediger vnd Väterlicher wille  
 ist.

Das andere / das Paulus vns hie wil fürhalten / ist das  
 ( denn ich nur die kurtzen Punct nach einander erzehle ) das  
 nemlich wir diesen grossen Schatz haben vnd tragen mit  
 vns in irrdischen Gefessen. Lieben Christen / wir hören im-  
 merdar predigen / vnd lesen in Gottes Wort / das der Son  
 Gottes vns sey geschenckt vnd geben / das er sein sol vnser  
 Selige

Seligmacher vnd Heyland / vnser Gott vnd HErr. Womit fassen wir solches? womit hören wir solches? Mit vnsern armen sündlichen Ohren hören wir die Predigt des Euangelij. Wo kömpt es hin? Oder wo sol es hinkommen durch krafft vnd Wirkung des heiligen Geists aus vnsern Ohren? In vnser armes elendes sündhafftiges hertz.

Daraus sol nun der safft vnd der trost komen in vns/vñ also in Leib vnd Seel/ das wir wissen / als arme sündhafftige Menschen / das vnser Seel vnd Leib / das ist / wir ganz vnd gar sind Kinder Gottes / vnd bleiben Kinder Gottes / vnd wollen Kinder Gottes sein in alle ewigkeit / Erben Gottes vnd Miterben des HErrn Christi Ihesu / Das ist jetzt vnser höchster / tewerster vnd gröster Schatz / grösser denn Himmel vnd Erden / vnd alles was darinnen erschaffen ist. Solchen Schatz aber tragen wir in irrdischen Gefessen. Wiewol Paulus hie fürnemlich redet vom Ampt der Kirchendiener / Jedoch gehets durchaus auch zugleich auff alle Christgleubige / die diesen trost haben vnd sagen : Ich bin ein armer Sünder / vnd mein Leib mus wegen der sünden sterben / vnd zur Wurmspeiß werden / Aber dennoch hab ich einen Schatz / den trag ich in einem irrdischen vergenglichen Gefesz / das auff dieser Welt vergehet / vnd abscheidet von meiner Seel / welche auch vom Leib abscheiden mus. In meinem Leib / der verwesen mus / trag ich diesen Schatz herum / vnd weiß / das mir diesen Schatz niemand aus meinem hertzen reißen kan / weder die Sünd / noch auch der Zorn Gottes / noch der Fluch des Gesezes. Denn so bald ich den HErrn Christum ergreiffe / vnd in mein hertz fasse / der grösser ist denn Himmel vnd Erden / ja welcher Schatz selbs Himmel vnd Erden / vnd alles was darinnen ist / erschaffen hat / vnd der mich erlöset hat / durch sein tewer Blutuergiesen / So trag vnd habe ich diesen Schatz bey vnd in mir /  
vnd

8.  
vnd niemand kan diesen Schatz vnterdrücken / noch mir denselben rauben / ja er bleibt selbs bey mir / vnd macht mich hoch vñ gros / freudig vnd mutig / vnd für den augen Gottes lebendig vnd selig / das mich niemand aus der Hand Gottes des Vaters / Gottes des Sons / vnd Gottes des heiligen Geistes reißen kan / oder reißen sol / oder reißen mag.

Das ist vnser Schatz / den wir mit vns tragen in vnsern armen irdischen Gefessen / in vnser armen Seelen / in vnserm armen Leib / in vnsern armen Gliedmassen / gleich wie ich jekunder rede mit meinem Mund von diesem Schatz / vnd den ich auff meiner zunge habe / wie ihr diesen Schatz höret mit ewren Ohren. Den wer da gleubet an den HErrn Christum / vnd das Liecht des Euangelij ansihet / der fasset solchen Schatz / vnd tregt ihn mit sich / vnd lebet dars auff frölich / vnd stirbet darauff seliglich / vnd hat alles mit einander / vnd hat mehr denn Himmel vnd Erden werde ist / vnd alles / was darinnen erschaffen ist. Darzu denn vns allen Gott helffen wolle / das wir solchen Schatz in vnsern Herzen behalten / vnd darauff leben / vnd darauff von hinnen scheiden können.

Zum dritten / helet vns S. Paulus für eine lehr vom Creutz / vnd spricht: Ihr habt diesen Schatz / vnd wenn ihr ihn selbst nicht verlassen / verachten vnd außschlagen wollet / so wird ihn Gott in euch wol erhalten. Nu ist Gottes wille / das wer diesen Schatz wil mit sich tragen / vnd behalten / der mus durchs Creutz bewehret sein / vnd durch allerley not durch vnd wider herdurch gezogen werden / nach dem Exempel des HErrn Christi Ihesu / der der ewige Son Gottes ist / vnd Mensch worden / vnd ohne alle sünde vnd mackel ist / vnd dennoch zur Herrligkeit / wie er sitzt zur rechten Gottes des Vaters / sein fleisch oder Menschliche Natur  
nicht

nicht erheben sollen (denn also ist die ordnung Gottes ge-  
wesen) es were denn / das er durchs Creutz / leiden vnd tode  
hindurch drünge. Diesem Exempel nach / müssen wir  
auch das Creutz haben / vnd vns desselben nicht wegern. Ans-  
ders kans nicht sein. Alle Christen menschen müssen Creutz  
haben / vnd müssen dazu sterben / vnd durch den zeitlichen  
Tode dringen / welcher das letzte Creutz / vnd der letzte Feind  
ist / Darumb der HErr Christus sagt: Wer mir folgen  
wil / vnd mein Jünger sein / der neme sein Creutz auff sich /  
vnd folge mir also / etc. Vnd durch viel Creutz vnd trübsal /  
sollen vnd müssen wir eingehen zum ewigen leben / vnd ewi-  
ger Herrlichkeit. Darumb sagt Paulus hie: Wir haben  
trübsal / aber wir engsten vns nicht. Vns ist bange / aber wir  
verzagen nicht. Vnd wir werden nieder vnd vntergedruckt /  
aber wir kommen nicht vmb. Da nimpt er alles Creutz der  
gleubigen zu hauff. Wir haben stets allerley trübsal / bald  
an der Seel / inwendig im Gewissen / bald an eusserlichen  
Gliedmassen / bald am guten Namen / bald an Gütern / bald  
werden wir verfolget / gemartert / verzaget / getödtet. So  
gehet es zu in der Welt / da ist allerley trübsal. Wir has-  
ben trübsal / aber wir engsten vns nicht. Das spricht nun  
ein Christ / der den Schatz tregt: Ich habe wol trübsal / da  
kömpt diese vnd andere qual / aber ich engstige mich nicht.  
Fleisch vnd blut thuts wol wehe (darumb sich die vngleubis-  
gen / vnbusfertige vnd sichere Leute / in das Creutz / wenn  
ihnen was widerwertigs begegnet / nicht schicken können /  
sondern werden vngedültig / vnd murren.) Aber ein Christ /  
der newgeboren ist / spricht / Ich habe mein Datum auff  
den HErrn Christum gesetzt / Ich habe ihm meinen willen  
vnterworffen / wie ers machet / so sol mirs gefallen. Er gibe  
mir krafft / mut vnd freudigkeit / Der Geist vnd mut / das ist /  
Der glaub in mir / sol allzeit die oberhand behalten vñ obsiege.

B

Das

Das heist / wir haben trübsal / aber wir engsten vns nicht / vnd vns ist bang / aber wir verzagen nicht. Es kömpt mancher Christ dahin / das ihm so bang wird / das er todts schweis schwizet / wie wir sehen an francken Menschen / die zum Todes zügen greiffen. Da ist einem jeden bang / aber wir verzagen nicht / das ist / vnser leben vnd vertrawen stehet immer auff dem HErrn Christo / der wird helfen / vnd vns selig machen. Vnd ob wir verfolget werden / so sind wir doch nicht verlassen. Verlesset mich gleich Vater vnd Mutter / verlassen mich alle alte vnd newe freunde / mein HErr Christus Jhesus verlesset mich nicht / vnd werde ich vntergedrückt / vnd wil mich die Welt nicht leiden / was ist ihm denn mehr ? wir werden darumb nicht verworffen / stehet hie / wir kommen auch nicht vmb. Vnd ob vns das leben genommen wird / vnd wir durch den Todt müssen hindurch dringen / ligt auch nichts dran / denn in dem HErrn Christo leben wir / in ihm sollen wir vollkommen sein : Ich lebe / vnd ihr solt auch leben / sagt der HErr Christus.

Vnd das ist zu mal schön / das er dazu seket / Wir / wir alle / wie wir beyssammen / tragen in vns das sterben des HErrn Christi Jhesu immerdar / zu jeder zeit / auff das das Leben des HErrn Jhesu an vnserm sterblichen fleische offenbar werde. Wie ist das so herrlich / schön vnd tröstlich ? Du / Ich / wir / stehen jetzt da / reden vnd hören. Was ist aber mit vns allen / vnd mit eines jeden sterben ? Ein jeder mus sagen : Ich armer Aschenbrödel / Ich armer elender Sünder / oder Sünderin / Ich armer elender Madensack / Ich trage das sterben an meinem Leib / vnd ich sterbe teglich / ich werde alle tage elter / krencker / vnuermöglicher / verdrossen vnd schwach / vnd meine gesundheit nimpt nicht zu / sondern nimpt ab / meine sünde nemen nicht ab / nemen  
immer



immer zu vnd wachsen / Darumb gehört der Todt auff die  
Sünde / vnd ich mus sterben. Aber es ist das sterben nicht  
mein / nicht ich sterbe / nicht du stirbest / nicht wir sterben / sons  
dern wenn wir den HErrn Christum durch den glauben in  
vnsern herzen haben / so heist das sterben des HErrn Chris  
sti Ihesu sterben / der einmal für vns alle gestorben ist / vnd  
wenn ich sterbe / wenn du stirbest / wenn wir sterben / wer ist  
gestorben? vnd wem wirds zugerechnet? Gleich wie vnser  
sünde der HErr Christus auff sich genommen: Also heist  
Todt / das sterben des HErrn Ihesu / vnd er wil haben / das  
wir sterben sollen / das wir / wie er gestorben ist / ihm folgen.  
Vnd heist sein Todt / vnser Todt / auff das sein leben an vns  
armen elenden Sündern offenbar werde.

Ist das nun war / das wir sterben / So ist auch dieses  
war / das wir wollen leben / Vnd ist war / das vnser sterben  
ist des HErrn Ihesu sterben? So ist auch war / das vnser  
leben ist des HErrn Ihesu leben. Wo nun Ihesus ist vnd  
lebet / da wollen wir auch sein / leben vnd bleiben in ewigkeit /  
wie er selber sagt: Vater / Ich wil / das wo ich bin / auch die  
sein / die du mir gegeben hast. Vnd wir auch also sagen vnd  
beten sollen / Vater vnser / der du bist im Himmel / Ich wil /  
das ich da sey / da dein lieber Son ist / den du mir gegeben  
hast. Vnd ist nun also hie eine gleichheit des lebens vnd tods  
des Christi / vnd vnser lebens vnd vnser tods. Darumb  
vns aus dem Todt niemand wird erretten / denn Christus  
allein / vnd wird vns niemand das Leben geben / denn er al  
lein. Denn er ist das Leben. Vnd das ist der Christen trost /  
darauff wir vns verlassen / leben / vnd zu seiner zeit abschei  
den sollen.

Letzlich ( mit kurzen Worten ) spricht S. Paulus / wars  
umb vns denn das Creuz vnd Todt wird auffgeleget / vnd  
erzelet

B ij

22.  
erzelet etliche vrsachen / die kein Philosophy / vnd kein Mens  
schliche vernunfft verstehet / vnd spricht: Gott wil haben /  
das wir sollen Creutz haben vnd sterben. Warumb? wie jetzt  
gesagt / Das das leben des HErrn Ihesu an vnserm sterb  
lichen fleisch offenbar werde.

Ich wolt mir nicht wünschen / ein ander ( der ein Christ  
ist ) würde ihm gleicher gestalt auch nicht wünschen / das er  
immer leben solt in diesem leben / Vnd wenn ers ihm gleich  
wünschte / das er immer hie in dieser Welt lebete / so were  
es kein Christlicher wunsch. Ein Christ gedencet: Auff  
dieses leben bin ich nicht beschieden / vnd bin nur hie im Vor  
hoff des HErrn / bin in Hoff des HErrn noch nicht kom  
men / Ich höre allhie sein Wort / vnd hab den brauch der  
hochwürdigen Sacrament / vnd sehe ihn noch nicht / wie ich  
ihn in ewigkeit anschawen / vnd in ihm leben sol.

Item / wie zuuor gesagt / Ich neme nicht ab mit meis  
nen sünden / je lenger ich lebe / je mehr ich sündige / vnd wech  
set die sünde immer in mir.

Wo ist aber das beste leben? Bin ich ein Christ / so sag  
ich: Bey meinem HErrn Ihesu ist das beste leben. Bege  
restu denn nicht auch da zu sein / da Gott der Vater / Gott  
der Son / vnd Gott der heilige Geist lebet / regiert / vnd ans  
geschawen / vnd vollkömlich vnd ewiglich gelobet wird? Ja.  
Je so begere ich hie nicht zu bleiben / sondern begere auffge  
löset zu werden / vnd bey meinem HErrn Ihesu zu sein / auff  
das das leben Ihesu an mir offenbar werde. Es wird auch  
wol hie offenbar an mir / an dir / vnd an allen gleubigen / wenn  
wir sein Wort hören / vnd haben den Glauben vnd trost /  
vnd wenn das Creutz kömpt / so muntern wir vns auff / vnd  
ruffen herzlich an den HErrn Christum / in vnsern nöten.  
Doch geschicht solches alles noch / wie in einem Spiegel /  
bis

15  
bis wir volckömlich verkleeret werden im ewigen leben / 2.  
Corinth. 3.

Die ander vrsach / spricht Paulus / das wir Creuz  
haben müssen / ist / das wir den Geist des Glaubens has  
ben. Das ist auch zu mal schön. Ein Mensch / der Creuz  
hat / vnd mercket / das er von hinnen scheiden / vnd sterben  
sol / vnd kömpt heut ein Bote / morgen ein Bote / vnd ein jes  
der Bote saget: Schicke dich / du must fort / es ist zeit / Oder  
kömpt sonst ein widerwertigkeit / ein krankheit / oder etwas  
das vns wehe thut / vnd vns anzeiget / das wir sterblich sein /  
vnd dauon müssen / Was geschicht? Ein solcher Christ / der  
den HErrn Christum im herten hat / wird dadurch nicht  
kleinmütig / sondern starck gemacht / vnd überkömpt einen  
mut vnd Geist / der wircket Glauben vnd Gebet / vnd durch  
den Glauben gedult vnd sanfftmüt / das er sich ergibt in den  
willen Gottes / vnd kan alles das / was zeitlich ist / verach  
ten / vnd spricht: Was frage ich nach Himmel vnd Erden /  
HERR / wenn ich nur dich habe / so hab ich genug / vnd ich  
beger bey dir zu sein / vnd aus diesem Jammerthal abzuschei  
den / wenn es dein Göttlicher wille ist. Darumb gib lieber  
HERR / das ich rechten Glauben behalt / vnd rechten ver  
stand deines Worts / vnd der hochwirdigen Sacrament /  
vnd ein gottselig leben führe / vnd das ich bereit sey / wenns  
dein wille ist / das ich zu dir komme / vnd zu dir fahre / vnd  
ewig mit dir lebe. Das heist der Geist des Glaubens / vnd  
der Geist des muts / den Gott gibet / der solchen mut wir  
cket in vns / vnd heist ein krafft Gottes.

Darnach erzelet S. Paulus noch eine vrsach / das wir  
müssen Creuz vnd leiden haben / Das wir nemlich des alten  
Menschen vergessen / vnd denselben von tag zu tag ablegen /  
vnd einen newen Menschen vberkommen / in Christo Jesu.

B iij

Item /

14.  
Item / das wir hie durch den Todt vnd Creuz hindurch  
dringen zu der ewigen vnd grossen Herrligkeit / das ist / ins  
ewige leben. Item / Das wir das sichtbare vergessen / vnd  
auff das vnsichtbare achtung geben / Nicht sehen auff das /  
was für augen ist / sondern sehen im herken auff das / das wir  
mit leiblichen augen nicht sehen / welches ist die Himlische  
freude / da Gott alles in allen sein wird / vnd wir sein / leben  
vnd bleiben werden in Gott / in ewigkeit.

Das ist die kurze summa dieser wort / des heiligen Apos-  
tels Pauli.

Nun haben wir jekunder ( das wir zum ende kommen )  
eine solche Christliche Leich bestattet zu der Erden / die eben  
solchen glauben an den HErrn Ihesum Christum / vnd sol-  
chen Geist des glaubens mit ihrem bekenntnis dargethan  
hat / dauon ich nicht wil viel wort machen / Aber das wil  
ich sagen / welches vns lebendigen in dieser Welt zum trost  
gesagt wird / den wir alle mercken sollen / das nemlich diese  
Adels person / derer Leichnam wir jetzt beylegen / zur erken-  
nis vnd bekenntnis seiner sünden / durch das Creuz gefüret /  
den HErrn Christum von herken ergriffen vnd gefasset /  
vnd also selziglich vns alle gesegnet hat / mit diesen worten /  
wie ich dieselbigen in gegenwart anderer Christen angehö-  
ret vnd behalten habe :

H E R R Ihesu Christ / du bist je mein Erlö-  
ser vnd Seligmacher / mein Gott vnd Vater / ich  
bin je dein Kind / du wirst mich nicht verlassen / des  
bin ich gewisz / Ich bin ein armer Sünder / aber O  
H E R R Ihesu Christe / du hast für mich bezaleet / mit  
deinem leiden vnd sterben / komme mir armen sün-  
der

15  
der zu hülffe. Ich bin durch dich selig. Ich glaube  
an dich / an dich hale ich mich / in deine Hende be-  
fehl ich meinen Geist / Du hast mich erlösi / HErr  
Ihesu du getrewer Gott / erhalte mich in rechtem  
Glauben beständig bis an mein ende / Du wirst es  
thun / des bin ich gewiß / Ach HErr hilff / Amen.  
Wenn du wilt / HErr Ihesu / so bin ich bereit / Ach  
HErr hilff / vnd komme / vnd mache mich ewig se-  
lig / vnd laß dein bitter leiden vnd sterben an mir ar-  
men Sünder nicht verloren werden.

Nun ein solch bekentnis vnd gebet in vnser letzten heims-  
fart / gebe auch mir vnnd euch der gütige getrewe Gott /  
der H E R R Ihesus Christus / vnd helffe vns allen  
gnediglich / vnnd mache vns ewig  
selig A M E N.



Gedruckt zu Leipzig / Durch Jac-  
cob Berwaldts Erben.

I 5 7 9.

Faint, illegible text in a Gothic script, likely bleed-through from the reverse side of the page.

Second block of faint, illegible text in a Gothic script, also likely bleed-through.



Faint text at the bottom of the page, possibly a signature or a date, which is mostly illegible.







Faint, illegible markings or bleed-through from the reverse side of the page.



Za 3610.

X2207760

M. P.





Farbkarte #13

B.I.G.

redigt  
ebnis des

den Davids.

/ etc.

n 28. Julij / An

laum Seneccerum /

dieselbige nachgez  
gezeichnet



7.  
n Antlitz in gerech  
en / wenn ich erwa

J.  
XIX.

